



Sumáriu Kazu

Tribunál Judisiál Primeira Instáncia Baukau

Juñu 2024

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

Sumáriu prosesu julgamentu kazu iha Tribunál Judisiál Primeira Instáncia Baukau

1. Totál kazu ne'ebé JSMP monitoriza: 21¹

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	13
Artigu 146 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD) artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física grave ho natureza violénsia doméstika no arma brankas	1
Artigu 154 KP no artigu 2, 3, 35 no 36 (LKVD)	Maus-tratus ba kónjuje	2
artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Arma brankas	2
Artigu 145 Kódigu Penál (KP) artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física simples no arma brankas	1

¹ Totál kazu 21 ne'e la representa totál kazu ne'ebé Tribunál Judisiál Primeira Instáncia Baukau julga iha fulan Juñu 2024

Artigu 145 Kódigu Penál (KP), artigu 258 (KP) & artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física simples, danu simples no arma brankas	1
Artigu 261 (KP)	Uzurpasaun ba imovel	1
Totál		21

1. Totál desizaun ne'ebé JSMP monitoriza: 17

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	3
Pena multa	Artigu 67 KP	11
Suspensaun ba prizaun nia ezekusaun no omologa	Artigu 68 KP	2
Pena multa no indemnizasaun sivíl	Artigu 67 KP	1
Totál		17

2. Totál kazu sira ne'ebé adia tuir JSMP nia monitorizasaun :4

3. Totál kazu ne'ebé sei kontinua prosesu tuir JSMP nia monitorizasaun:0

A. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0045/23. BCBCV
 Kompozisaun Tribunál : Singulár
 Juis : Dr. Yudy Pamukas
 Prokuradór : Dr. Bartolomeu de Araújo
 Defeza : Dr. Germano Guterres Ramos
 Desizaun : Pena multa US\$75.00

Iha 03 Juñu 2024, Tribunál Judisiál Primeira Instáncia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu MM hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 27 FEVEREIRU 2023, iha oras tuku 19:00 kalan, arguidu tuku dala rua iha lezada nia knosen no basa dala rua iha lezada nia hasan parte loos. Antes agresaun ne'e, arguidu ho lezada diskute malu kona-ba lezada ba halimar iha banin nia uma fila tarde no la halo modo.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende nia hahalok, depoisde akontesimentu ne'e di'ak malu ona ho lezada, arguidu nu'udar membru PNTL ho vensimentu kada fulan US\$630.00 hodi sustenta de'it família.

Alende ne'e, lezada kontinua konfirma faktu hotu iha akuzasaun no deklara mós katak di'ak malu ona ho arguidu no depoisde akontesimentu ne'e la baku ona lezada.

Alegasaun finál

Prokuradór haktuir katak arguidu nia aktu ne'e priense elementu hosi krime ne'ebé prokuradór akuza ba arguidu, mezmú sira di'ak malu ona maibé atu halo prevensaun atu arguidu la komete tan krime ne'e iha futuru husu ba tribunál atu kondena arguidu ho pena multa.

Alende ne'e, defeza mós konkorda ho alegasaun prokuradór nian atu kondena arguidu ho pena multa, mezmú arguidu konfesa, arrepende nia hahalok no di'ak malu ona ho lezada.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia knosen no basa dala rua iha lezada nia hasan parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$75.00 ne'ebé arguidu sei selu US\$1.00 kada loron durante loron 75. Tribunál mós fiksa pena alternativa durante loron 50 prizaun, bainhira arguidu la kumpri pena multa refere.

1. Krime ofensa ba integridade fízika simples no arma brankas

Nú. Prosesu	: 0005/22.BCPVN
Kompozisaun Tribunál	: Kolektivo
Juis	: Dra. Maria Modesta d. A. Viera no Dr. José António d. Escurial no Dra. Sribuana da costa
Prokuradór	: Dra. Remizia de Fátima da Silva
Defeza	: Dr. Germano Ramos Guterres
Desizaun	: Pena prizaun tinan 3 suspende ba tinan 3 no omologa pedidu dezisténsia keixa

Iha 04 Juñu 2024, Tribunál Judisiál Primeira Instánsia Baukau Prezide julgamentu leitura akordaun ba krime ofensa ba integridade fízika simples no arma brankas ne'ebé envolve arguidu Luciano de Sousa Benevides hasoru

lezadu Levio Adilson de Sousa no Estadu RDTL, iha Suku Uma Ana Iku, Postu Administrativu Venilale, Munisípiu Baukau.

Akuzasaun Prokuradór

Prokuradór akuza katak iha 29 Jullu 2022, iha oras tuku 22:00 kalan, arguidu hein netik iha dalan ho katana no bainhira testemuña lao to'o iha fatin, arguidu lori katana ho pozisaun atu taa testemuña maibé la konsege tanba testemuña ho naran José de Sousa mak hako'ak netik arguidu, nune'e katana monu sai hosi arguidu nia liman.

Arguidu konsege lori liman kaer lezadu nia faru gola hodi tuku tui-tuir malu dala haat iha lezadu nia kanuruk halo lezadu oin nakukun monu kedas ba iha rai.

Prokuradór akuza arguidu kontra artigu 145 KP kona-ba ofensa ba integridade física simples no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Arma Brankas, Rama Ambon no Kinta Alterasaun Kódigu Penál.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu relasiona ho krime ofensa ba integridade física simples tanba kazu ne'e klasifika nu'udar krime semi públiku no nia prosedimentu depende ba keixa. Lezada no arguidu konkorda nune'e, tribunál halo prosesu konsiliaun.

Iha prosesu konsiliaun ne'e, lezadu hakarak deziste nia keixa hasoru arguidu no arguidu mós konkorda. Bazeia ba konkordánsia hosi parte rua, tribunál omologa pedidu dezisténsia keixa ne'e.

Entretantu ba krime arma brankas, tribunál kontinua hala'o prosesu julgamentu.

Iha prosesu julgamentu, arguidu deklara katak arrepende nia hahalok, foin primeiravés mai hatan iha tribunál no deklara katak fila hosi natar kaer ho katana iha dalan rona testemuña tolok arguidu ne'e mak arguidu nervozu tuku dala haat iha testemuña nia kanuruk, katana arguidu apenas kaer de'it derepente Sr. José de Sousa mai hako'ak arguidu nune'e katana monu sai hosi arguidu nia liman.

Alende ne'e, testemuña Levio Adilson de Sousa depoimentu katak arguidu uza duni katana tenta atu taa lezadu mak Sr. Jose de Sousa satan netik hafoin katana monu sai hosi arguidu nia liman.

Testemuña Jose de Sousa nu'udar viziñu depoimentu katak arguidu kaer ho katana mak kaer testemuña Levio Adilson de Sousa nia faru gola hodi tuku dala haat iha testemuña nia kanuruk, ne'e mak testemuña ba satan netik hafoin katana monu sai hosi arguidu nia liman.

Alegasaun finál

Prokuradór haktuir katak, iha produsaun ba prova testemuña Levio Adilson de Sousa konfirma faktu iha kauzasaun no testemuña Jose de Sousa mós depoimentu katak arguidu uza katana mak halo agresaun hasoru testemuña Levio Adilson de Sousa, nune'e husu ba tribunál atu tau krebilidade ba testemuña sira nia depoimentu hodi foti desizaun justu ba arguidu.

Entretantu defeza haktuir katak arguidu nu'udar agrikultór uza katana no fila hosi natar mak iha dalan mosu diskusaun ho testemuña arguidu halo agresaun maibé la uza katana hodi halo krime hasoru testemuña Levio Adilson de Sousa, tanba ne'e husu ba tribunál atu absolve arguidu hosi prosesu ne'e.

Desizaun

Depoisde avalia faktu hotu, tribunál prova katak arguidu uza katana atu taa testemuña Levio Adilson de Sousa maibé la konsegue tanba testemuña José de Sousa mak hako'ak netik arguidu nune'e katana monu sai hosi arguidu nia liman.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

2. Krime ofensa ba integridade fízika simples ho natureza violénsia doméstika

Nú. Prosesu	: 0016/23. PDBAU
Kompozisaun Tribunál	: Singulár
Juis	: Dr. Yudy Pamukas
Prokuradór	: Dr. Bartolomeu de Araújo
Defeza	: Dr. Germano Guterres Ramos
Desizaun	: Pena multa US\$25.00

Iha 04 Juñu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu RCX hasoru nia feen, iha Munisípiu Baukau.

Akuzaun Prokuradór

Prokuradór akuza katak iha 30 Janeiro 2023, iha oras tuku 06:00 dadeer, arguidu tuku dala ida iha lezada nia matan fukun, tuku dala ida iha lezada nia matan parte loos lezada satan netik ho liman hodi kona fali lezada nia liman, hafoin arguidu kontinua tebe dala ida iha lezada nia kabun no tuku dala ida iha lezada niaibun. Antes ne'e, arguidu ho lezada diskute malu kona-ba lezada ba partisipa festa kazamentu dansa ho mane seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35 (b) LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira hotu iha akuzasaun no deklara katak foin primeiravés mai hatan iha tribunál no promete sei la komete tan aktu hanesan hasoru lezada iha futuru, depoisde akontesimentu liu lora ida di'ak malu ona, arguudu nu'udar motorista vensimentu US\$100.00.

Alende ne'e, lezada mós konfirma ba faktu sira iha akuzasaun no deklara katak depoisde akontesimentu ne'e liu lora ida sira di'ak malu fali no to'o agora arguidu la komete ona krime seluk hasoru lezada.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós hosi lezada, prokuradór konsidera arguidu nia aktu ne'e priense duni krime ne'ebé akuza ba arguidu, nune'e husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza husu ba tribunál atu kondena arguidu ho pena ne'ebé adekua ho konsiderasaun katak, arguidu konfesa, foin primeiravés mai hatan iha tribunál no promete sei la komete tan krime hanesan hasoru lezada.

Desizaun

Depoisde avalia faktu hotu, tribunál prova katak arguidu tuku dala ida iha lezada nia matan fukun, tuku dala ida iha lezada nia matan parte loos lezada satan netik ho liman hodi kona fali lezada nia liman, hafoin arguidu kontinua tebe dala ida iha lezada nia kabun no tuku dala ida iha lezada niaibun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, foin primeiravés mai hatan iha tribunál no promete sei la komete tan krime hanesan hasoru lezada, nune'e tribunál konklui prosesu ne'e no kondena arguidu ho pena multa US\$25.00 ne'ebé arguidu sei selu 0,50 sentavus kada lora durante lora 50. Tribunál mós fiksa pena alternativa durante lora 32 prizaun, bainhira arguidu la kumpri pena multa refere.

3. Krime arma brankas

Nú. Prosesu	: 0009/22.BCQLC
Kompozisaun Tribunál	: Koletivu
Juis	: Dra. Maria Modesta d. A. Viera, Dr. José António d. Escorial, no Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Grigório M. L. de Lima
Desizaun	: Pena prizaun tinan 3 suspende ba tinan 3

Iha 05 Juñu 2024, Tribunál Judisiál Primeira Instánsia Baukau prezide leitura sentensa ba krime arma brankas ne'ebé envolve arguidu Manuel Silveira hasoru Estadu RDTL, iha Suku Lavateri, Postu Administrativu Baguia, Munisípiu Baukau.

Akuzasaun Prokuradór

Prokuradór akuza katak iha 16 Agostu 2022, iha oras tuku 16:00 lokraik testemuña Graciano Silveira ba nia banin nia uma atu bolu nia feen fila ba sira nia uma atu haree sira nia oan, bainhira to'o banin nia uma, tuur hela ho banin feto derepente arguidu mai hosi toos kaer ho katana besik testemuña hit katana atu taa testemuña maibé lakonsege tanba testemuña halai tiha arguidu hakilar tuir dehan "ó hamrik metin hau taa rahun tiha ó."

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no kontra artigu 2(nú.1(b), nú. 2(a)) no artigu20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak momentu ne'e arguidu iha hela to'os mak arguidu nia feen telefone katak Graciano atu bolu nia feen ba sira nia uma, nune'e arguidu fila ba uma, bainhira arguidu to'o iha uma arguidu nia oan feto dehan katak apa mai ona, testemuña rona katak arguidu mai ona testemuña halai tiha, maibé la'os arguidu mak duni no ameasa testemuña ho katana.

Entretantu, testemuña Graciano Siveira depoimentu katak, testemuña ba iha banin nia uma atu bolu nia feen, derepente arguidu mosu ho katana hit sae katana atu taa testemuña ne'e mak testemuña halai, hafoin arguidu hakilar tuir "ó hamrik metin hau taa rahun tiha ó."

Alegasaun finál

Prokuradór konsidera arguidu provadu komete krime arma brankas bazeia ba testemuña nia deklarasaun ne'ebé konfirma totalmente akuzasaun katak arguidu transforma duni katana nia funsaun ba krime, nune'e husu ba tribunál atu kondena arguidu ho pena minimu hosi krime ne'e no suspende ba período hanesan.

Entretantu, defeza husu ba tribunál atu kondena arguidu ho pena ne'ebé adekua, tanba iha julgamentu arguidu deklara katak arguidu la komete krime hasoru lezada.

Desizaun

Depoisde avalia faktu hotu, tribunál prova katak arguidu kaer ho katana besik testemuña hit katana atu taa testemuña maibé la konsege tanba testemuña halai tiha.

Bazeia ba faktu provadu sira ne'e no tetu mós ho sirkunstánsia hotu ne'ebé halau krime ne'e, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

4. Krime arma brankas

Nú. Prosesu : 0066/22. BCBCV
Kompozisaun Tribunál : Koletivu

Juis : Dra. Sribuana da Costa, Dr. José António d.
Escorial no Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Sidónio Maria Sarmiento
Desizaun : Pena prizaun tinan 3 suspende ba tinan 3

Iha 06 Juñu 2024, Tribunál Judisiál Primeira Instánsia Baukau prezide leitura akordaun ba krime arma brankas ne'ebé envolve arguidu Jeferino Guterres (editál) hasoru Estadu RDTL, iha Suku Bahu, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 04 Abril 2022, iha oras tuku 17:30 lokraik, arguidu lori katana duni no ameasa atu taa testemuña SMX ho nia inan TJM, bainhira testemuña halai ba uma laran arguidu ko'alia ba testemuña katak "*hamrik metin para hau taa mate imi*" tanba ta'uk testemuña ho nia inan xave tiha odamatan nune'e arguidu hamrik iha liur mak tolok testemuña ho nia inan.

Prokuradór akuza arguidu kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Tribunál halo julgamentu editalmente ba arguidu tanba arguidu ba tiha ona estranjeiru ka servisu iha nasaun Australia.

Testemuña SMX depoimenta katak derepente arguidu ba uma foti katana mai duni testemuña ho nia inan ne'e mak testemuña ho nia inan ta'uk halai tama ba uma laran xave metin odamatan mak rona arguidu iha liur tolok sira.

Testemuña GJX depoimentu katak momento sai hosi serbisu haree arguidu uza katana duni testemuña nia alin ho nia inan, ho nune'e testemuña kontaktu polisía.

Alegasaun finál

Prokuradór haktuir katak, arguidu la marka prezensa maibé liuhosi julgamentu editál, testemuña sira konfirma ho akuzasaun, nune'e prokuradór konsidera arguidu nia aktu ne'e priense elementu hosi krime arma brankas tanba uza katana hodi duni testemuña, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak haree ba faktu sira ne'ebé produs iha audensia julgamentu, nune'e husu ba tribunál atu fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu kaer katana duni no ameasa atu taa testemuña.

Bazeia ba faktu provadu sira ne'ebé produs iha julgamentu, tribunál konsidera faktu hotu provadu, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

5. Krime ofensa ba integridade física simples ho natureza violénsia doméstika

Nú. Prosesu : 0022/23.BCEVN
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Americo Luis Freitas Belo (Advogadu Privadu)
Desizaun : Pena multa US\$45.00

Iha 11 Juñu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu JdSM hasoru nia feen, iha Munisipiu Baukau.

Akuzasaun Prokuradór

Prokuradór akuza katak iha 20 Agostu 2023, iha oras tuku 21:00 kalan, arguidu tebe dala haat iha lezada nia ulun. Antes ne'e, arguidu ho lezada diskute malu kona-ba lezada soe piadas ba arguidu to'o mosu agresau ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu deklara mós katak depoisde akontesementu ne'e lezada ba tiha nia inan-aman nia uma liu semana ida mak arguidu ba tuir lezada hodi sira rezolve problema ne'e perante família no promete sei la baku tan lezada, arguidu nu'udar profesór voluntáriu la iha vensimentu fiksi kada fulan.

Alende ne'e, lezada kontinua konfirma faktu hotu iha akuzaasun no deklara tan katak depoisde akontese liu semana ida mak sira di'ak malu perante família rua no forma família iha tinan 2006, iha oan na'in lima, foin primiravés baku lezada no to'o agora la baku ona lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós hosi lezada, mezmú sira di'ak malu ona maibé atu prevene arguidu komete tan aktu ne'e iha futuru hasoru lezada husu ba tribunál atu kondena arguidu ho pena multa.

Entretantu, defeza husu ba tribunál atu kondena arguidu ho pena admoestasaun ho konsiderasaun katak, arguidu konfesa no di'ak malu ona ho lezada no promete sei la komete tan aktu hanesan hasoru lezada iha futuru.

Desizaun

Depoisde avalia faktu sira hotu, tribunál prova katak arguidu tebe dala haat iha lezada nia ulun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa di'ak malu ona ho lezada no promete sei la komete tan krime hanesan hasoru lezada iha futuro, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$0,50 centavus kada loraun durante loraun 90. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

6. Krime ofensa ba integridade física simples ho natureza violéncia doméstika

Nú. Prosesu : 0028/23. BCBCV
Kompozisaun Tribunál : Singulár
Juis : Dr. Yudy Pamukas
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun tinan 1 suspende ba tinan 1

Iha 13 Juñu 2024, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu TAB hasoru nia feen LdCF no oan MTB, iha Munisípiu Baukau.

Akuzasaun Prokuradór

Prokuradór akuza katak iha 10 Outubru 2023, iha oras tuku 15:00 lokraik, arguidu tuku dala rua iha lezada LdCF nia kotuk laran, basa dala ida iha lezada nia hasan parte loos no basa dala ida iha lezada nia kelen parte loos. Antes ne'e, arguidu ho lezada diskute malu kona-ba arguidu basa dala ida iha lezada MTB nia hasan.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa, konjuga ho artigu 2, 3(a,c), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu no foin primeiravés mai hatan iha tribunál no promete sei la komete tan krime hanesan iha futuro.

Alende ne'e, lezada LdCF kontinua konfirma faktu hotu iha akuzasaun no deklara katak depoisde akontesimentu ne'e sira di'ak malu ona no arguidu la komete tan krime seluk hasoru lezada sira.

Tribunál presindi lezada MTB, tanba lezada LdCF konfesa faktu hotu iha akuzasaun, nune'e tribunál konsidera faktu naton ona.

Alegasaun finál

Prokuradór haktuir katak faktu akuzasaun prokuradór prosedente provadu haree ba arguidu nia deklarasaun no lezada nia konfirmasaun ba akuzasaun, prokuradór konsidera arguidu provadu komete krime rua ho natureza VD hasoru nia feen no nia oan, nune'e atu prevene arguidu nia konduta iha futuru atu labele akontese tan husu ba tribunál atu kondena arguidu ho pena multa.

Entretantu, defeza haktuir katak iha produsaun ba prova arguidu konfesa faktu sein rezerva, foin primeiravés mai hatan iha tribunál no promete sei la komete tan krime hanesan iha futuru, tanba ne'e husu ba tribunál atu fó pena ne'ebé kmaan ba arguidu.

Desizaun

Depoizde avalia faktu hotu, tribunál prova katak arguidu tuku dala rua iha lezada LdCF nia kotuk laran, basa dala ida iha lezada nia hasan parte loos no basa dala ida iha lezada nia kelen parte loos. Antes ne'e, arguidu ho lezada diskute malu kona-ba arguidu basa dala ida iha lezada MTB nia hasan.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

7. Krime ofensa ba integridade fízika simples ho natureza violénsia doméstika

Nú. Prosesu	: 0078/23.BCBCV
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Bartolomeu de Araújo
Defeza	: Dra. Laura Valente Lay
Desizaun	: Pena multa US\$30.00

Iha 17 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu MdCL hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 10 Abril 2023, iha oras tuku 23:00 kalan, arguidu tebe lezada maibé lezada satan netik ho liman nune'e la kona lezada, tuir mai arguidu silu lezada nia liman rua ba kotuk, rezulta moras hafoin arguidu rakut lezada nia liman to'o kanek. Antes ne'e, arguidu ho lezada diskute malu kona-ba bainhira arguidu fila ba uma arguidu nia isin nakonu ho tato.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese sira di'ak malu perante familia rua, arrepende ninia hahalok no foin primeiraves halo agresaun hasoru lezada no mai hatan iha tribunál.

Alende ne'e, lezada konfirma faktu hotu iha akuzasaun, depoisde akontese sira di'ak malu perante familia rua, arguidu foin primeiraves halo agresaun hasoru lezada no depoisde akontesimentu ne'e arguidu la komete ona krime hasoru lezada.

Alegasaun final

Prokurador haktuir katak faktu iha akuzasaun prokurador prosedente provadu haree ba arguidu nia deklarasaun no lezada nia konfirmasaun ba akuzasaun, tanba ne'e husu ba tribunál atu kodena arguidu ho pena multa.

Entretantu, defeza husu ba tribunál atu kondena arguidu ho pena ne'ebé justu ho konsiderasaun katak arguidu konfesa, arrepende ninia hahalok di'ak malu ona ho lezada no foin primeiraves mai hatan iha tribunál.

Desizaun

Depoisde avalia faktu hotu, tribunál prova katak arguidu silu lezada nia liman rua ba kotuk, rezulta moras hafoin arguidu rakut lezada nia liman to'o kanek.

Bazeia ba faktu provadu sira ne'e no tetu mos ho sirkunstansia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiraves mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mos fiksa pena alternativa durante loron 40 prizaun, bainhira arguidu la kumpri pena multa refere.

8. Krime ofensa ba integridade física simples ho natureza violência doméstica

Nú. Prosesu	: 0059/23. PDBAU
Kompozisaun Tribunál	: Singulár
Juisa	: Dr. Jose Escorial
Prokurador	: Dr. Ambrósio Rangel Freitas
Defeza	: Dr. Sidónio Maria sarmento
Desizaun	: Pena multa US\$30.00

Iha 18 Juñu 2024, Tribunál Judisiál Primeira Instáncia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu QSM hasoru nia feen, iha Munisípiu Baukau.

Akuzasaun Prokurador

Prokurador akuza katak iha 25 Abril 2023, iha oras tuku 09:00 dadeer, arguidu tuku dala ida iha lezada nia reen-toos parte karuk rezulta moras. Nune'e lezada direita ba hato'o keixa iha polisia. Antes ne'e, arguidu ho lezada diskute malu kona-ba sira nia oan tanis to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu sira hotu iha akuzasaun no deklara katak foin primeiravés mai hatan iha tribunál, promete sei la baku tan lezada iha futuro, depoisde akontesimentu di'ak malu ona perante família rua, arguidu nu'udar agrikultor ho rendimentu ne'ebé la fiksu.

Alende ne'e, lezada mós konfirma faktu sira iha akuzasaun no haktuir katak depoisde akontese liu loron ida sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós hosi lezada, prokuradór haree katak arguidu nia aktu priense duni elementu hosi krime ne'ebé imputa ba arguidu, depoisde akontesimentu kontinua moris hamutuk hanesan feen ho la'en nune'e prokuradór husu ba tribunál atu kondena arguidu ho pena multa.

Entretantu defeza, husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa integralmente ba faktu sein rezerva, arrepende ninia hahalok, promete iha futuro sei la komete tan krime seluk hasoru lezada.

Desizaun

Depoisde avalia faktu hotu, tribunál prova katak arguidu tuku dala ida iha lezada nia reen-toos parte karuk rezulta moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

9. Krime ofensa ba integridade fízika simples ho natureza violénsia doméstika

Nú. Prosesu	: 0013/23. BCQLC
Kompozisaun Tribunál	: Singulár
Juis	: Dr. Yudy Pamukas
Prokuradór	: Dr. Ambrósio Rangel Freitas
Defeza	: Dr. António Fernandes
Desizaun	: Pena multa US\$25.00

Iha 18 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu CPP hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 10 Juñu 2023, iha oras tuku 08:30 kalan, arguidu kaer lezada nia fuuk bobar iha liman rezulta lezada monu ba rai, bainhira lezada hamrik fali arguidu kaer no dada lezada nia liman rezulta lezada monu tan ba rai, lezada nia ain kona iha parede rezulta kanek no raan, arguidu mós buti lezada nia kakorok, hafoin lori kadeira masa baku dala ida iha lezada nia kotuk laran. Antes ne'e, arguidu ho lezada diskute malu kona-ba lezada lori fos no naan ba família sira to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu seluk loos hotu no faktu ne'ebé laloos mak arguidu la uza kadeira baku lezada. Arguidu mós deklara katak halo agresaun hasoru lezada tanba lezada tama uma kalan boot no depoisde akonetesimentu lezada ba hela ho nia inan-aman to'o agora la fila no sira nia oan na'in rua hela hamutuk ho arguidu, arguidu simu nafatin lezada nu'udar nia feen maibé defende ba lezada, arrepende ninia hahalok no foin primeiravés mai hatan iha tribunál no no arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara tan katak momentu fila kalan tanba lori fos no naan fahi ba kuñada sira. Depoisde akontesementu ne'e lezada mak diside hakarak moris separa ho arguidu.

Alegasaun finál

Prokuradór haktuir katak faktu akuzasaun prokuradór prosedente provadu haree ba lezada nia deklarasaun ne'ebé konfirma totalmente ba akuzasaun mezmú arguidu konfesa parsialmente no agora sira moris separa ona, maibé atu nafatin asegura arguidu nia konduta iha futuru atu labele halo tan agresaun hasoru lezada tanba sira hela besik malu. Tanba ne'e husu ba tribunál atu kondena arguidu ba pena multa.

Entretantu, defeza haktuir katak mezmú arguidu konfesa parsial maibé arguidu nafatin hatudu ninia arrependementu, hakarak di'ak malu maibé lezada mak lakohi ona atu moris hamutuk ho arguidu nu'udar feen la'en. Tanba ne'e husu ba tribunál fó pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu kaer lezada nia fuuk bobar iha liman rezulta lezada monu ba rai, bainhira lezada hamrik fali arguidu kaer no dada lezada nia liman rezulta lezada monu tan ba rai, lezada nia ain kona iha parede rezulta kanek no raan, arguidu mós buti lezada nia kakorok, hafoin lori kadeira masa baku dala ida iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu deklara faktu sira, arrepende ninia hahalok, seidak di'ak malu no foin primeiravés mai hatan iha tribunál, nune'e tribunál konklui prosesu

ne'e no kondena arguidu ho pena multa US\$25.00 ne'ebé arguidu sei selu 0.50 centavus kada loron durante loron 50. Tribunál mós fiksa pena alternativa durante loron 32 prizaun, bainhira arguidu la kumpri pena multa refere.

10. Krime ofensa ba integridade fízika simples ho natureza violénsia doméstika

Nú. Prosesu : 0011/23. BCBQI
Kompozisaun Tribunál : Singulár
Juis : Dr. Yudi Pamukas
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$25.00 no indeminizasaun
sivil US\$100.00

Iha 18 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu CC hasoru nia feen, iha Munisípiu Baukau.

Akuzaun Prokuradór

Prokuradór akuza katak iha 18 Dezembru 2023, iha oras tuku 16:00 lokraik, arguidu foti fatuk tuda dala ida iha lezada nia ain-kabun rezulta kanek no raan. Antes ne'e, arguidu ho lezada diskute malu kona-ba arguidu haruka lezada halot nia roupa atu sai hosi uma to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé imputa ba arguidu ne'e loos hotu, arguidu hatutan tan katak lezada tolok ne'e mak arguidu tuda lezada no depoisde akontesimentu ne'e lezada ho sira nia oan na'in tolu ba hela iha uma-mahon to'o agora sidauk fila ba uma, bainhira lezada fila arguidu simu nafatin nu'udar nia feen, arrepende ninia hahalok no foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e lezada ho sira nia oan na'in tolu ba hela tiha iha uma-mahon to'o agora. Lezada deklara liután katak bainhira sai hosi uma-mahon lezada lakohi moris hamutuk ona ho arguidu.

Alegasaun finál

Prokuradór haktuir katak akuzasaun prokuradór prosedente provadu tanba hetan konfirmasaun hosi arguidu no lezada rasik, depoisde akontesimentu ne'e lezada hodi nia oan sira ba hela hotu iha uma-mahon, lezada la konfortavel ho arguidu nia hahalok, tanba ne'e lezada hakarak moris separa ho arguidu, tanba ne'e husu ba tribunál atu kondena arguidu ho pena prizaun tinan ida suspende ba tinan tolu.

Entretantu, defeza haktuir katak iha produsaun ba prova arguidu konfesa, arrepende ninia hahalok, foin primeiravés mai hatan iha tribunál. Tanba ne'e husu ba tribunál fó suspensaun ba arguidu menus hosi pedidu prokuradór nian.

Desizaun

Depoisde avalia faktu hotu, tribunál prova katak arguidu foti fatuk tuda dala ida iha lezada nia ain-kabun rezulta kanek no raan.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, seidak di'ak malu no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$25.00 ne'ebé arguidu sei selu 0.50 centavus kada lora durante lora 50. Tribunál mós fiksa pena alternativa durante lora 32 prizaun, bainhira arguidu la kumpri pena multa refere no selu mós indemnizasaun sivíl ba lezada US\$100.00.

11. Krime ofensa ba integridade fízika simples ho natureza violénsia doméstika

Nú. Prosesu	: 0108/23. PDBAU
Kompozisaun Tribunál	: Singulár
Juis	: Dr. Yudy Pamukas
Prokuradór	: Dr. Bartolomeu de Araújo
Defeza	: Dr. António Fernandes
Desizaun	: Pena multa US\$35.00

Iha 18 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu JdCF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 22 Dezembru 2022, iha oras tuku 14:00 lokraik, arguidu basa dala rua iha lezada nia hasan parte loos, tebe dala ida iha lezada nia kabun kidun rezulta lezada monu ba rai, hafoin arguidu kaer lezada nia fuuk hodi fai ba arus odamatan nian rezulta bubu no moras. Antes ne'e, arguidu ho lezada diskute malu kona-ba sira nian oan ne'ebé monu to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha kuzasaun ne'e loos hotu no depoisde akontese sira di'ak malu ona, arrepende ninia hahalok to'o agora la baku ona lezada, serbisu nu'udar agrikultór rezultadu hodi sutenta de'it ba família

Alende ne'e, lezada kontinua konfirma faktu hotu iha akuzasaun, depoisde akontese sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak haree ba produsaun ba prova provadu katak arguidu halo agresaun hasoru lezada, nune'e atu prevene arguidu nia hahalok ne'e iha futuru hodi labele hatoman-an rezolve problema ho krime, tanba ne'e husu ba tribunál atu kondena arguidu ho pena multa.

Entretantu, defeza haktuir katak arguidu konfesa faktu hotu ne'ebe konstitui ba krime, arrepende ninia hahalok, foin primeiravés mai hatan iha tribunál, di'ak malu ona ho lezada, tanba ne'e husu ba tribunál atu aplika pena justu ba arguidu.

Desizaun

Depoizde avalia faktu hotu, tribunál prova katak arguidu basa dala rua iha lezada nia hasan parte loos, tebe dala ida iha lezada nia kabun kidun rezulta lezada monu ba rai, hafoin arguidu kaer lezada nia fuuk hodi fai ba arus odamatan nian rezulta bubu no moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$35.00 ne'ebé arguidu sei selu 0.50 centavus kada loron durante loron 75. Tribunál mós fiksa pena alternativa durante loron 50 prizaun, bainhira arguidu la kumpri pena multa refere.

12. Krime ofensa ba integridade física simples ho natureza violénsia doméstika

Nú.Prosesu	: 0007/23. BCVMS
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Bartolomeu de Araújo
Defeza	: Laura Valente Lay
Desizaun	: Pena multa US\$30.00

Iha 24 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu MdJR hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 27 Setembru 2023, iha oras tuku 01:00 madrugada, lezada toba hela, arguidu fila mai uma sein motivu ne'ebé klaru tuku dala ida iha lezada niaibun rezulta kanek no raan, hafoin tuku tan dala ida iha lezada nia hasan parte loos rezulta metan no bubu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa katak faktu iha akuzasaun ne'e loos hotu, arrepende nia hahalok no depoisde akontesimentu ne'e di'ak malu ona ho lezada, arguidu deklarasaun mós katak, arguidu ba serbisu halo ema nia uma mak hemu tua to'o kalan no fila kalan boot ho kondisaun lanu halo agresaun refere hasoru lezada, arguidu nu'udar agrikultór ho rendimentu ne'ebé la fiksa.

Alende ne'e, lezada konfirma faktu hotu iha akuzasaun no deklarasaun katak iha akontesimentu ne'e arguidu ho kondisaun lanu no depoisde akontese sira di'ak malu ona no agora moris hamutuk nafatin nu'udar feen la'en.

Algesaun finál

Prokuradór haktuir katak faktu akuzasaun prokuradór prosedente provadu haree ba arguidu nia deklarasaun no lezada nia komfirmasaun ba akuzasaun, akuzasaun prokuradór prosedente provadu no la difikulta tribunál atu hetan verdade. Tanba ne'e husu ba tribunál atu kondena arguidu ho pena multa.

Entretantu, defeza husu ba tribunál atu kondena arguidu ho pena ne'ebé justu ho konsiderasaun katak, arguidu konfesa, arrepende nia hahalok no di'ak malu ona ho lezada no to'o agora moris hamutuk nafatin nu'udar feen ho la'en.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ibun rezulta kanek no raan, hafoin tuku tan dala ida iha lezada nia hasan parte loos rezulta metan no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 centavus kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

13. Krime ofensa ba integridade fízika simples ho natureza violénsia doméstika

Nú. Prosesu	: 0062/23. MNMNT
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Albino d Jesus Perreira
Desizaun	: Pena multa US\$25.00

Iha 25 Juñu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu DS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 29 Outubru 2023, iha oras tuku 10:00 dadeer arguidu basa dala ida iha lezada nia hasan parte loos no kaer lezada nia liman hodi dulas rezulta moras. Antes ne'e, arguidu ho lezada diskute malu kona-ba

lezada atu ba selebra finadu iha foho maibé arguidu la aseita to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese, sira di'ak malu kedas iha eskuadra polísia, arrepende ninia hahalok, foin primeiravés mai hatan iha tribunál no no arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara katak depoisde akontesimentu ne'e lezada ba hato'o keixa iha eskuadra polísia no sira di'ak malu kedas iha eskuadra polísai no moris hamutuk nafatin nu'udar feen ho laen no to'o agora arguidu la baku ona lezada.

Alegasaun finál

Prokuradór haktuir katak faktu iha akuzasaun prokuradór prosedente provadu haree ba lezada nia deklarasaun ne'ebé konfirma totalmente ba akuzasaun. Akuzasaun prokuradór prosedente provadu, mezmu sira di'ak malu ona. nafatin asegura arguidu nia konduta iha futuro atu labele halo tan agresaun hasoru lezada, husu ba tribunál atu kondena arguidu ho pena multa.

Entretantu, defeza haktuir katak haree ba produsaun prova parte defeza konkorda prokuradór nia alegasaun atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte loos no kaer lezada nia liman hodi dulas rezulta moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$25.00 ne'ebé arguidu sei selu 0,50 centavus kada loron durante loron 50. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

14. Krime ofensa ba integridade fízika simples ho natureza violénsia doméstika

Nú. Prosesu	: 0059/23. MNMNT
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. Albino d. Jesus Perreira
Desizaun	: Pena multa US\$30.00

Iha 25 Juño 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu RSVG hasoru nia feen, iha Munisípiu Manatuto.

Akuzaun Prokuradór

Prokuradór akuza katak iha 30 Setembru 2023, iha oras tuku 16:30 lokraik, arguidu tuku dala rua iha lezada nia inus rezulta kanek no raan. Antes ne'e, arguidu ho lezada diskute malu kona-ba arguidu telefone ba lezada maibé lezada la simu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé imputa ba nia ne'e loos hotu, arguidu deklara tan katak sira forma família iha tinan 2013, iha oan na'in tolu foin primeiravés mai hatan iha tribunál, di'ak malu ona ho lezada no to'o agora la baku ona lezada.

Alende ne'e, lezada konfirma faktu hotu iha akuzasaun, depoisde akontese sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak haree ba produsaun ba prova no provadu katak arguidu halo agresaun hasoru lezada, nune'e atu prevene arguidu nia hahalok ne'e iha futuro hodi labele hatoman-an rezolve problema ho krime no comunidade sira seluk mos labele halo tuir arguidu nia hahalok, husu ba tribunál atu kondena arguidu ho pena multa.

Entretantu, defeza haktuir katak arguidu konfesa faktu hotu ne'ebé constitui ba krime, arrepende ninia hahalok, foin primeiravés mai hatan iha tribunál, di'ak malu, tanba ne'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu, tribunál prova katak arguidu tuku dala rua iha lezada nia inus rezulta kanek no raan.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$25.00 ne'ebé arguidu sei selu 0,50 centavus kada lora durante lora 50. Tribunál mós fiksa pena alternativa durante lora 30 prizaun, bainhira arguidu la kumpri pena multa refere.

15. Krime ofensa ba integridade física simples ho natureza violénsia doméstika

Nú. Prosesu : 0055/23.BCBCV
Kompozisaun Tribunál : Singulár

Juis : Dr. Yudy Pamukas
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena multa US\$30.00

Iha 11 Juñu 2024, Tribunál Judisiál Primeira Intánsia Baukau, prezide julgamentu leitura sentensa ba krime ofensa ba intgridade fizika simples ho natureza VD ne'ebé envolve arguidu OdCFB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 11 Marsu 2023, iha ora tuku 22:00 kalan, arguidu tuku dala rua iha lezada nia kanuruk no tebe dala haat iha lezada nia kotuk laran, arguidu kontinua rasta lezada ba varanda no lori kadera masa baku dala ida iha lezada nia isin. Antes agresauñ ne'e, arguidu ho lezada diskute malu kona-ba lezada deskonfia arguidu ba nia eis namoradu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklaratan katak forma família iha tinan 2020, iha oan na'in ida foin primeiravés baku lezada, agora la baku ona lezada no arguidu nu'udar motorista kareta bemo ho vensimentu kada fulan US\$150.00

Alende ne'e, lezada konfirma faktu hotu iha akuzasaun, akontese kuaze fulan ida mak di'ak malu fali to'o agora moris hamutuk nafatin no arguidu la baku ona lezada.

Alegasaun finál

Prokuradór haktuir katak , arguidu ho intensaun pratika krime ho natureza violénsia doméstika hasoru lezada nu'udar nia feen rasik, tuir loloos arguidu mak proteze lezada maibé pelo kontrariu arguidu mak halo fali agresauñ hasoru lezada. Tanba ne'e husu ba tribunál atu kondena arguidu ba pena multa.

Entretantu defeza haktuir katak arguidu konfesa faktu hotu iha akuzasaun, arrepende ninia hahalok, di'ak malu ona ho lezada no foin primeiravés mai hatan iha tribunál, tanba ne'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu, tribunál prova katak arguidu tuku dala rua iha lezada nia kanuruk no tebe dala haat iha lezada nia kotuk laran, arguidu kontinua rasta lezada ba varanda no lori kadera masa baku dala ida iha lezada nia isin.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 centavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

16. Krime ofensa ba integridade fizika simples, danu sipmles no arma brankas

Nú. Prosesu : 0102/19. BCBCV
Kompozisaun Tribunál : Koletivu
Juis : Dra. Sribuana Costa, Dr. José António d. Escurial
no Dra. Maria Modesta d. A. Viera
Prokuradór : Dr. Bartolomeo de Araújo
Defeza : Dr. Sidónio Maria Sarmento
Desizaun : Pena prizaun tinan 3 suspende ba tinan 3 no
omologa pedidu dezisténsia keixa

Iha 26 Juñu 2024, Tribunál Judisiál Primeira Instánsia Baukau prezide julgamento ba kazu ofensa ba integridade fizika simples, danu simples no arma brankas ne'ebé envolve arguidu Marcelino da Costa hasoru lezadu Jose da Costa no lezadu Ilaria da Costa no Estadu RDTL, iha Suku Bahu, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 13 Agostu 2019, iha oras tuku 07:30 dadeer, lezadu Jose da Costa no Ilaria da Costa hili hela fatuk atu kuda modo iha fatin refere, arguidu mosu mai kaer ho sabit iha liman dehan katak "*se mak haruka imi taka dalan*" arguidu emidiata uza sabit taa kotu tali ne'ebé kesi lutu ne'e, hafoin arguidu foti fatuk tuda dala ida iha lezada Ilaria da Costa nia kotuk laran.

Prokuradór akuza arguidu kontra artigu 145 KP kona-ba ofensa ba integridade fizika simples no artigu 258 KP kona-ba danu sipmles, artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun prova sira

Bazeia ba artigu 262 (1) KPP kona-ba tentativa ba konsiliaun, nune'e antes tama ba julgamentu podusaun ba prova, juis halo tentativa konsiliaun ba aguidu, lezadu no lezada relasiona ho krime ofensa ba integridade fizika simples no danu simples tanba kazu sira ne'e klasifika nu'udar krime semi públiku no nia prosedimentu depende ba keixa. Iha tentativa konsiliaun ne'e lezadu/a no arguidu konkorda atu konsilia, nune'e tribunál halo konsiliaun ba parte sira.

Iha prosesu konsiliaun ne'e, lezadu/a hakarak deziste tiha sira nia keixa hasoru arguidu no arguidu mós konkorda. Bazeia ba konkordánsia hosi parte

rua, tribunál omologa tiha pedidu dezisténsia keixa ne'e. Entretantu ba krime arma brankas, tribunál kontinua hala'o prosesu julgamentu.

Iha prosesu julgamentu, arguidu deklara katak nia nu'udar mestre EBC Santo Domingos savio kaer ho sabit atu halo limpeza iha eskola mak haree dalan taka tiha ho lutu ne'e mak arguidu nervozu tesi kotu tiha tali ne'ebé kesi lutu refere.

Prokuradór husu ba tribunál atu presinde lezadu/a ninia deklarasaun, tanba arguidu konfesa faktu hotu iha akuzasaun no konsidera katak faktu sira ne'e nato'o ona.

Alegasaun finál

Prokuradór haktuir katak arguiudu provadu uza sabit taa kotu tali ne'ebé kesi lutu ne'e. Arguidu nu'udar mestre tuir loloos uza meus seluk atu rezolve laos uza dalan krime hodi rezolve problema seluk, akuzasaun prokuradór prosedente provadu, tanba ne'e husu ba tribunál atu kondena arguidu ba pena minimu hosi krime ne'e suspende ba período hanesan.

Entretantu, defeza haktuir katak haree ba iha produsaun ba prova arguidu konfesa faktu katak uza sabit atu ba eskola mak haree dalan taka ne'e uza sabit hodi tesi kotuk tiha tali sira, tanba ne'e husu ba tribunál atu fo pena kmaan ba arguidu.

Desizaun

Depoizde avalia faktu hotu, tribunál prova katak arguidu arguidu uza sabit taa kotu tali ne'ebé kesi lutu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>